

Tawaf Wada' Dan Tawaf Sunat Di Dataran Kaabah: Hukum Jemaah Haji Dan Umrah Menipu Memakai Ihram Di Musim Endemik Dari Justifikasi Undang-Undang Kerajaan Arab Saudi Dan Perspektif Fiqh, Al-Quran, Hadis Rasulullah Saw Dan Maqasid Syariah

Hj. Lukmanul Hakim Hj. Hanafi (Penulis utama)

Fakulti Syariah dan Undang-Undang, Universiti Sains Islam Malaysia, 71800 Nilai, Negeri Sembilan, Malaysia.

Tel: +60196754646, E-Mel: lukmanul@usim.edu.my

Syahirah Abdul Shukor, USIM

Nik Salida Suhaila Nik Salleh, USIM

Wan Abdul Fattah, USIM

Ahmad Syukran Baharuddin, USIM

Raja Razif Bin Raja Shahrudin, USIM

Abstrak

Kertas kerja ini bertujuan menerangkan dan menjelaskan bagaimana hukum Tawaf Wada' dan Tawaf Sunat di Dataran Kaabah bagi jemaah haji dan umrah yang menipu memakai ihram ketika ini di Musim Endemik selepas berakhirnya Musim Pandemik Covid-19 dari justifikasi undang-undang Kerajaan Arab Saudi dan Perspektif Fiqh, al-Quran, dan Hadis Rasulullah saw. Bagi mencapai objektif penulisan ini, method keperpustakaan atau analisa dokumen digunakan untuk menganalisa semua dokumen berkaitan yang dikumpul. Dapatan kertas kerja ini mendapati hukum menunaikan Tawaf Wada' dan Tawaf Sunat di Dataran Kaabah bagi jemaah haji dan umrah yang menipu memakai ihram ketika ini adalah haram, berdosa dan dibimbangi mengganggu kemabruran Haji dan Umrah berdasarkan Fiqh, al-Quran, hadis Rasulullah saw dan Maqasid Syariah serta adab dan akhlak Mazmumah. Manakala justifikasi dan keputusan yang diputuskan oleh Undang-undang kerajaan Arab Saudi yang membenarkan Tawaf di Dataran Kaabah hanya untuk Jemaah Haji pada Musim Haji sahaja dan Jemaah Umrah bagi yang menunaikan Ibadat Umrah sahaja adalah tepat dan selari dengan Al-Quran dan As-Sunah, Fiqh dan Maqasid Syariah bagi mengelakkan Masyaqqah, Zahmah, bersesak-sesak dan kemudharatan serta penularan Penyakit Covid-19 dan Influenza yang mana mempunyai hikmahnya yang tersendiri. Diharapkan, hasil penulisan ini akan menjadi panduan dan rujukan kepada bakal-bakal jemaah Haji dan Umrah yang akan datang agar dapat mengikuti dan mentaati undang-undang Tawaf Wada' dan Tawaf Sunat yang ditetapkan oleh Ulil' Amri iaitu Pemerintah Kerajaan Arab Saudi dan menyakini hikmahnya dalam melaksanakan Ibadat Haji dan Umrah berdasarkan akhlak mahmudah seterusnya memperolehi Haji dan Umrah yang Mabruur.

Kata kunci: Tawaf Wada', Tawaf Sunat, Dataran Kaabah, Endemik Covid19, Justifikasi, Hukum Fiqh, Al-Quran, Hadis

Pendahuluan

Larangan Tawaf Wada' dan Tawaf Sunat di Dataran Kaabah ini bermula tatkala tindakan Kerajaan Arab Saudi mengumumkan tidak membenarkan Jemaah Haji dunia yang tinggal diluar negaranya menunaikan ibadat Haji pada musim Haji 2020 yang lalu di Tanah Suci Mekah melainkan hanya membenarkan 10,000 jemaah Haji yang tinggal di dalam negara Arab Saudi sahaja yang boleh menunaikan Ibadat Haji pada tahun tersebut. Kemuncak rasa kekecewaan jemaah Haji dunia ini sekali lagi terpancar apabila Kerajaan Arab Saudi sekali lagi mengumumkan buat tahun kedua berturut-turut bahawa jemaah Haji dunia yang tinggal diluar negaranya sekali lagi tidak dibenarkan menunaikan ibadat Haji pada musim Haji 2021 di Tanah Suci Mekah melainkan Kerajaan Arab Saudi hanya membenarkan 60,000 jemaah Haji yang tinggal di dalam Negara Arab Saudi sahaja yang boleh menunaikan Ibadat Haji pada tahun ini. Ini bermakna kedua-dua tahun iaitu 2020 dan 2021 tiada ibadat umrah dibenarkan juga untuk Jemaah Dunia.

Namun begitu alhamdulillah, pada Musim Haji 2022, Kerajaan Arab Saudi telah membuka kembali pintu sempadannya, apabila membenarkan Jemaah haji dunia menunaikan ibadat Haji buat kali pertama selepas hampir dua tahun tiada ibadat Haji bagi Jemaah Dunia yang tinggal di luar Negara Arab Saudi. Namun begitu Quota yang dibenarkan bagi setiap negara adalah kecil iaitu separuh sahaja dari Quota 0.1% yang dibenarkan oleh OIC. Ini sebagai langkah berjaga-jaga Kerajaan Arab Saudi dalam mengawal kehadiran Jemaah Dunia yang ramai disamping bimbang jangkitan penyakit Covid-19 kembali menular. Bagi negara Malaysia, Maka Quota yang diperolehi pada ketika itu adalah 16, 400 termasuk Quota tambahan. Jumlah kehadiran Jemaah Dunia menunaikan ibadat Haji pada tahun 2022 adalah lebih kurang 8,76.000 tidak lebih 1 juta jemaah.

Manakala Pada musim Haji tahun ini 2023, Kerajaan Arab Saudi telah kembali membuka pintu sempadannya secara besar-besaran diatas keyakinan berjaya mengawal wabak covid-19 ketika musim Haji 2022. Ini dapat disaksikan apabila semua negara dikurniakan quota penuh 0.1% dari jumlah penduduk negara tersebut berdasarkan undang-undang OIC yang mana Negara Malaysia sebagai contoh dikuniakan Quota penuh 32, 600 orang. Walaupun Kerajaan Arab Saudi telah kembali membuka pintu sempadannya kepada Jemaah Dunia untuk menunaikan Haji dan Umrah, namun beberapa undang-undang baru ketika melaksanakan ibadat Haji dan Umrah telah diperkenalkan. Ini adalah bertujuan untuk mengekang jangkitan penyakit Covid-19 kembali menular dikalangan Jemaah haji dan Umrah. Diantaranya Jemaah Haji dan Umrah hanya dibenarkan beribadat di Dataran Kaabah ketika menunaikan ibadat Rukun dan Wajib Haji dan Umrah sahaja.

Permasalahan

Kesan daripada keputusan Kerajaan Arab Saudi pada tahun 2022 dan 2023 yang mana hanya membenarkan Jemaah beribadat di Dataran Kaabah ketika menunaikan ibadat Rukun dan Wajib Haji dan Umrah sahaja dapat dilihat selepas bermulanya musim umrah buat kali pertama dibuka pada 2022 iaitu selepas hampir 3 tahun tiada ibadat umrah khususnya jemaah dunia di luar Arab Saudi. Pada peringkat awal iaitu pada bulan september 2022 ketika penulis menjalankan kajian iaitu ketika musim umrah baru bermula buat kali pertama selepas habis

musim haji 2022, maka didapati semua jemaah dunia mematuhi undang-undang yang ditetapkan. Kesannya, Dataran Kaabah menjadi sangat lapang kerana Jemaah yang ada di Dataran Kaabah hanyalah mereka yang melakukan Ibadat Umrah iaitu Tawaf Ifadah atau Tawaf Umrah, Solat Sunat Tawaf selepas selesai Tawaf Umrah, Berdoa, Melihat Kaabah, Berzikir dan juga bersujud syukur di depan Kaabah. Namun begitu, pada awal Disember ketika Jemaah Dunia mula berduyun-duyun datang ke Kota Mekah kerana cuti sekolah dan cuti musim sejuk sehinggalah hari ini, maka keadaan telah berubah, apabila Dataran Kaabah dilihat seperti tiada penghujungnya apabila Jemaah Dunia tetap ramai dan sesak. Kesemua mereka memakai ihram tidak kira pada waktu subuh sampailah ke subuh pada keesokan harinya. Ini yang menjadikan keadaan pelik kerana bagaimana Jemaah boleh padat walaupun undang-undang telah diperkenalkan. Diakhirnya, selepas diamati dan dikaji, maka didapati Jemaah Dunia melakukan penipuan, apabila mereka tidak mahu beribadat sunat di tingkat atas Masjidul Haram, tetapi sebaliknya tetap mahu beribadat sunat di Dataran Kaabah dengan alasan jika Tawaf Wada', Tawaf Sunat atau Ibadat sunat yang lain di Dataran Kaabah, maka ianya dekat dengan Kaabah dan cepat habis Tawaf. Sehubungan itu mereka telah menyamar dan menipu iaitu dengan memakai ihrah, seolah-olah mereka seperti mahu menunaikan ibadat umrah. Selepas berjaya memperdayakan Polis atau penjaga Pintu Masjidul Haram dan telah sampai ke Dataran Kaabah, mereka tidak melakukan ibadat umrah, sebaliknya melakukan ibadat Sunat seperti Tawaf Sunat juga Tawaf wada', Solat Berjemaah, duduk melihat Kaabah sambil berdoa dan berzikir dan lain-lain.

Definisi Ibadat Haji Dan Umrah

Syeikh Dr Wahbah Al-Zuhaili mengulas takrif haji tersebut dengan berkata: "Menziarahi tempat tertentu dalam masa tertentu untuk pekerjaan tertentu. Sebutan ziarah bermaksud pergi, tempat tertentu pula bermakna "Kaabah" dan Arafah"; masa tertentu pula bermaksud "pada bulan Syawal, Zulkaedah dan Zulhijah, khususnya 10 hari bahagian awal dalam bulan tersebut. Perbuatan tertentu pula bermaksud "datang ke tempat tertentu dengan berihram dan berniat untuk mengerjakan haji.

Syeikh Dr Wahbah Al-Zuhaili juga mengulas takrif umrah dari segi bahasa bermakna ziarah atau dengan makna lain menuju ke tempat yang makmur. Ia sesuai dinamakan demikian kerana ia boleh dilakukan sepanjang umur seseorang. Definisi umrah mengikut syara' ialah mengunjungi Kaabah untuk melakukan ibadah (لِلنُّسُكِ) iaitu tawaf dan saie. Ibadat haji tidak dapat menampung dan mengantikannya walaupun ia juga mengandungi tawaf dan saie (Al-Zuhaili: 1999).

Pensyariatan Ibadat Haji dan Umrah dari Perspektif Al-Quran dan Hadis

Ibadat Fardhu Haji termasuk juga Umrah merupakan salah satu daripada Rukun Islam yang lima. Hukumnya ialah fardhu ain ke atas setiap orang Islam yang mukallaf dan mampu. firman Allah SWT :

[البقرة:196-196] ﴿وَأَتِمُّوا الْحَجَّ وَالْعُمْرَةَ لِلَّهِ﴾

Maksudnya: "Dan sempurnakanlah ibadat Haji dan Umrah kerana Allah SWT"

(al-Baqarah 2: 196)

Sabda Rasulullah SAW:

بُئِيَ الْإِسْلَامَ عَلَى خَمْسٍ: شَهَادَةُ أَنْ لَا إِلَهَ إِلَّا اللَّهُ وَأَنَّ مُحَمَّدًا رَسُولُ اللَّهِ وَإِقَامُ الصَّلَاةِ وَإِيتَاءُ الزَّكَاةِ وَحَجُّ الْبَيْتِ وَصَوْمُ رَمَضَانَ

Maksudnya: "Didirikan Islam itu diatas lima rukun: Pengakuan bahawa tiada Tuhan melainkan Allah SWT dan bahawasanya Muhammad SAW itu pesuruh Allah SWT, mendirikan Sembahyang, menunaikan zakat, mengerjakan Haji di Baitullah dan berpuasa di bulan Ramadhan."

(Riwayat Bukhari: 1987: 7 dan Muslim: 2007: 21)

Mengikut pendapat yang sahih, ia difardhukan pada penghujung tahun ke 9 hijrah. Ini berdasarkan ayat al-Qur'an mengenai kefardhuannya iaitu firman Allah SWT:

(...) وَلِلَّهِ عَلَى النَّاسِ حِجُّ الْبَيْتِ مَنِ اسْتَطَاعَ إِلَيْهِ سَبِيلًا وَمَنْ كَفَرَ فَإِنَّ اللَّهَ غَنِيٌّ عَنِ الْعَالَمِينَ ﴿ [آل عمران:97]

Maksudnya: "Dan Allah SWT mewajibkan manusia mengerjakan ibadat haji dengan mengunjungi Baitullah iaitu sesiapa yang mampu sampai kepadanya. Dan sesiapa yang kufur (ingkarkan kewajipan ibadat haji itu), maka sesungguhnya Allah SWT Maha Kaya (tidak berhajatkan sesuatu pun) dari sekalian makhluk.

(Surah al-Imran 3:

97)

Ayat tersebut telah diturunkan pada tahun rombongan iaitu pada penghujung tahun ke-9 Hijrah. Ini adalah pendapat kebanyakan ulama'. Dengan itu Rasulullah SAW tidaklah melewati pelaksanaannya sehingga satu tahun. Rasulullah SAW hanya melakukan ibadat ini dalam tahun ke-10 hijrah dengan bersebab iaitu ayat ini turun setelah masa mengerjakannya berlalu. Pekerjaan haji yang Rasulullah SAW lakukan selepas hijrah adalah sekali iaitu di tahun ke 10 Hijrah seperti yang diriwayatkan oleh Ahmad dan Muslim (Al-Zuhaili: 1999: 4).

Hal ini juga berdasarkan hadis riwayat al-Bukhari dan Muslim, yang mana sabda Rasulullah SAW kepada rombongan Abd al-Qais yang menemui Baginda pada awal tahun 9 hijrah, dan bertanya tentang perintah yang wajib mereka lakukan;

أَمَرْتُمْ بِالْإِيمَانِ بِاللَّهِ، وَإِقَامِ الصَّلَاةِ وَإِيتَاءِ الزَّكَاةِ وَالْحَجِّ وَصَوْمِ رَمَضَانَ، وَأَنْ تُعْطُوا الْخَمْسَ مِنَ الْمَغْنَمِ

Maksudnya: "Aku perintahkan kamu beriman kepada Allah SWT mendirikan solat, menunaikan zakat, berpuasa pada bulan Ramadhan dan menyerahkan 1/5 daripada harta rampasa perang".

(Riwayat Bukhari: 1987: 7556)

Justeru sekiranya telah difardhukan sebelum tarikh tersebut tentulah Baginda SAW menyebutkannya bersama-sama perintah yang diarahkan kepada mereka (Al-Zuhaili: 1999:5).

Hukum dan kedudukan Ibadat Haji dan Umrah dari Perspektif Fiqh Islami

Ibadat haji merupakan rukun Islam yang kelima. Ia diwajibkan oleh Allah SWT ke atas orang yang mampu sekali sahaja sepanjang hayatnya. Begitu juga ibadat umrah. Mengikut pendapat ulama' Mazhab Shafi'i dan hambali, kedua-dua ibadat tersebut adalah wajib dilakukan berdasarkan firman Allah SWT: (Al-Bakri : 2011: 68).

﴿وَأَتِمُّوا الْحَجَّ وَالْعُمْرَةَ لِلَّهِ﴾ [البقرة:196]

Maksudnya:"Dan Sempurnakanlah Ibadat Haji dan Umrah Kerana Allah SWT"

(al-Baqarah: 2: 196)

Nabi Muhammad SAW telah melakukan umrah sebanyak empat kali, semuanya dalam bulan Zulkaedah kecuali yang dilakukan bersama dengan hajinya.Kali pertama Baginda SAW melakukannya dalam tahun keenam hijrah dilakukan dari Hudaibiyah: kali kedua pada tahun ketujuh hijrah iaitu umrah qada'; kali ketiganya dalam tahun kelapan hijrah, iaitu tahun pembukaan Makkah; dan kali keempatnya dikerjakan bersama dengan hajinya iaitu Baginda SAW berihram pada bulan Zulkaedah dan melakukannya dalam bulan Zulhijah.

Al-Qadi Husain, seorang ulama' daripada Mazhab Syafi'i berkata; "Ibadat haji adalah paling afdhal (utama) kerana ia meliputi penggunaan harta dan amalan fizikal". Al-Halimiy pula berkata; "Ibadat haji merangkumi semua pengertian ibadat; orang yang mengerjakan haji seolah-olah dia berpuasa, bersembahyang, beri'tiqaf, berzakat dan berjuang serta berperang di jalan Allah SWT. Kita diajak untuk mengerjakan haji ini sejak kita masih lagi dalam sulbi para bapa. Ibadat haji merupakan ibadat paling utama sama dengan keimanan itu sendiri". (Al-Zuhaili: 1999: 6).

Syarat Wajib Haji dan Umrah

Haji adalah salah satu dari rukun Islam yang wajib kepada umat Islam yang cukup syarat dan berkemampuan. Maka bermula syarat jatuhnya wajib keatas umat Islam menunaikan ibadat haji dan umrah jika memenuhi lima perkara iaitu Islam, baliqh, berakal, merdeka dan berkuasa. (Al-Fatani. 2004: 104).

Syarat Wajib Haji dan Umrah Dalam Kitab Fiqh

Islam

Ibadat haji dan umrah tidak wajib menunaikannya keatas orang bukan Islam. Ini adalah kerana kedua-duanya merupakan 'ibadat yang tidak dituntut ke atas mereka di dunia ini, malah tidak sah jika mereka melakukannya kerana Islam merupakan satu daripada syarat sah 'ibadat.

Baligh

Ibadat haji dan umrah tidak wajib menunaikannya keatas orang yang belum baligh seperti kanak-kanak. Hal ini disebabkan dia tidak dianggap mukallaf. Tetapi sekiranya kanak-kanak tersebut menunaikan haji dan umrah, maka haji dan umrahnya adalah sah dan dikira sebagai haji dan umrah sunat. (Lembaga Tabung Haji Malaysia: 2008. 16-177)

Berakal

Ibadat haji dan umrah tidak wajib ke atas orang gila atau tidak waras akalnya disebabkan dia tidak mampu membezakan suruhan dan tegahan.

Merdeka

Ibadat haji dan umrah tidak wajib keatas hamba sahaya disebabkan dia tidak memiliki sebarang harta. malah dirinya sendiri dan apa jua yang dimiliki adalah milik tuannya.

Berkemampuan/ Istito'ah (اِسْتِطَاعَةٌ)

Istito'ah bermaksud kemampuan untuk mengerjakan haji dan umrah. 'Ibadat haji dan umrah hanya wajib ke atas orang yang berupaya dan berkemampuan. Hal ini berdasarkan firman Allah SWT:

(وَلِلَّهِ عَلَى النَّاسِ حِجُّ الْبَيْتِ مَنِ اسْتَطَاعَ إِلَيْهِ سَبِيلًا وَمَنْ كَفَرَ فَإِنَّ اللَّهَ غَنِيٌّ عَنِ الْعَالَمِينَ) [آل عمران:97]

Maksudnya: "Dan Allah SWT mewajibkan manusia mengerjakan ibadat haji dengan mengunjungi Baitullah iaitu sesiapa yang mampu sampai kepadanya. Dan sesiapa yang kufur (ingkarkan kewajipan ibadat haji itu), maka sesungguhnya Allah SWT Maha Kaya (tidak berhajatkan sesuatu pun) dari sekalian makhluk".

(Surah al-Imran:3: 97)

Hal ini juga berdasarkan Hadis Rasulullah SAW:

عَنْ ابْنِ عُمَرَ رَضِيَ اللَّهُ عَنْهُ قَالَ: جَاءَ رَجُلٌ إِلَى النَّبِيِّ صَلَّى اللَّهُ عَلَيْهِ وَسَلَّمَ فَقَالَ: يَا رَسُولَ اللَّهِ مَا يُوجِبُ الْحَجَّ، قَالَ: الرَّأْدُ وَالرَّاحِلَةُ

Maksudnya: "Daripada Ibnu Umar R.A. katanya, "Seseorang lelaki menemui Nabi Muhammad SAW dan berkata, wahai Rasulullah, Apakah antara sebab yang mewajibkan haji? Baginda SAW bersabda, ada bekalan dan kenderaan".

(Riwayat al-Tarmizi:

818)

Perkataan bekal dan kenderaan dalam hadis ini mentafsirkan maksud perkataan berkemampuan dalam ayat al-Quran tersebut. (al-Khin, al-Bugha, al-Syarbaji: 2004: 21-24)

Di antara maksud dan syarat-syarat berkemampuan ialah:

1. Aman perjalanan pergi dan balik.
2. Cukup perbelanjaan dan nafkah pergi dan balik untuk dirinya.
3. Cukup keperluan nafkah asas bagi orang dibawah tanggungannya.
4. Ada kenderaan pergi dan balik.
5. Sihat tubuh badan.

Pengertian Tawaf

Tawaf bermaksud mengelilingi kaabah dengan syarat-syarat sahnya berserta dengan amalan-amalan sunatnya.

Syarat Sah Tawaf

1. Suci daripada hadas (Ada Wudhu)
(Berdasarkan Keputusan Muzakarah Haji Kebangsaan, Tidak batal Wudhuk ketika tawaf jika bersentuh dengan bukan mahram dengan syarat tanpa syahwat)
2. Suci Badan, pakaian dan tempat tawaf daripada Najis
3. Menutup aurat
4. Tawaf bermula dan berakhir daripada sudut hajar Aswad dan disunatkan berniat tawaf umrah. (Jika tawaf sunat/ tawaf nazar/ tawaf wida', maka diwajibkan berniat)
5. Menjadikan Baitullah berada di sebelah kiri dan berjalan ke hadapan
6. Berjalan bertujuan tawaf
7. Mengelilingi Kaabah sebanyak tujuh kali dengan yakin
8. Dilakukan di dalam Masjidil Haram dan di laur dari Hijir Ismail/ Syazarwan

Sunat-Sunat Tawaf

1. Tawaf dalam keadaan berjalan kaki
2. Berittiba' bagi tawaf yang diiringi dengan saie (lelaki)
3. Melakukan ramal (berlari-lari anak) bagi tawaf yang diiringi dengan saie (lelaki)

4. Istilam Hajar Aswad dan mengucupnya, manakala istilam ketika sampai di Rukun Yamani dan tidak mengucupnya
5. Membaca zikir dan doa
6. Melakukan tawaf sebanyak tujuh pusingan berturut-turut
7. Tawaf dengan khusyuk dan tawaduk
8. Sembahyang sunat tawaf setelah selesai melakukan tujuh pusing tawaf

Jenis-Jenis Tawaf

1. Tawaf Qudum

Tawaf Qudum ialah tawaf selamat datang yang disunatkan bagi mereka yang mengerjakan haji Iفراد dan Haji Qiran atau sekadar menziarahi Makkah. Sunat dilakukan Tawaf Qudum setibanya di Makkah dan harus dilewatkan sehingga sebelum berwuquf.

2. Tawaf Umrah

Tawaf Umrah ialah Tawaf Rukun yang mesti dilakukan oleh orang yang mengerjakan Umrah, sekiranya tidak dilakukan, maka tidak sah Ibadat Umrahnya.

3. Tawaf Haji

Tawaf Haji ialah Tawaf Rukun yang mesti dilakukan oleh Jemaah hajisetelah masuk waktunya iaitu bermula selepas separuh malam 10 Zulhijah. Sekiranya tidak dilakukan sama ada sengaja atau tidak, maka tidak sempurnalah Ibadat Hajinya. Ia juga dikenali dengan nama Tawaf Ifadhah.

4. Tawaf Tahiyat al-Bait

Tawaf Tahiyat al-Bait ialah Tawaf yang sunat dilakukan bagi menghormati Kaabah sewaktu memasuki Masjidul Haram.

5. Tawaf Sunat

Tawaf Sunat ialah Tawaf yang sunat dilakukan pada bila-bila masa.

6. Tawaf Nazar

Tawaf Nazar ialah Tawaf yang mesti ditunaikan seseorang apabila ia berniat nazar pada sesuatu yang dihajatnya, lalu nazarnya dikabulkan Allah swt, maka wajib baginya Tawaf Nazar.

7. Tawaf Wada' atau selamat tinggal

Tawaf Wada' ialah Tawaf Selamat Tinggal yang wajib dilakukan bagi mereka yang hendak meninggalkan Makkah lebih dari 2 Marhalah iaitu lebih kurang 56 batu atau 91 Kilometer dan lebih.

Aman dan selamat perjalanan musafir dari perspektif Qawaid al-Fiqhiah

Tidak wajib haji dan umrah ke atas orang yang bimbang akan ancaman musuh terhadap diri atau hartanya disebabkan ada kemudharatan. Begitu juga, sekiranya dikhuatiri terdapat bahaya dalam perjalanan seperti berlaku peperangan atau berlaku wabak (al-Bakri: 2011: 69).

Hal ini berdasarkan Firman Allah SWT:

وَلَا تُلْقُوا بِأَيْدِيكُمْ إِلَى التَّهْلُكَةِ

Maksudnya: "Dan janganlah kamu sengaja mencampakkan diri ke dalam bahaya kebinasaan (dengan bersikap bakhil)"...

(al-Baqarah: 2: 195)

Dalam buku *Istita'ah: Pengertian, Syarat dan Permasalahan Hukum*, perjalanan yang aman sama ada nyawa dan harta benda. Sekiranya merasa bimbang terhadap dirinya daripada penyamun, wabak penyakit, harta (al-Bakri: 2011: 70).

Maka, dia juga termasuk dan tergolong sebagai orang yang tidak mempunyai istita'ah. Ini bertepatan dengan kaedah Qawaidal-Fiqhiah:

إِنَّ كُلَّ تَصْرُفٍ جَرَّ فَسَادًا أَوْ دَفَعَ صَالِحًا فَهُوَ مَنْهِيٌّ عَنْهُ

Maksudnya: "Bahawa setiap tindakan yang membawa kerosakan atau yang menolak kemaslahatan, maka ianya ditegah"(al-Nadwi: 2000: 143).

Dr Wahbah al-Zuhaili berkata: "Keselamatan bermaksud keselamatan nyawa, harta orang yang mengerjakan haji dan umrah itu sepanjang jalan yang akan dilalui dan tempat yang sepatutnya diziarahi, walaupun hanya secara berat sangka (zanni)"(Al-Zuhaili: 1999: 30).

Maksudnya ialah keselamatan pada keseluruhannya. Jika seseorang itu rasa tidak selamat atau bimbang terhadap keselamatan nyawanya, isterinya atau hartanya kerana ada binatang buas, seteru, perompak atau penyamun (yang menunggu mereka) dan jalan-jalan lain yang selamat tidak ada, maka pada ketika itu haji dan umrah tidak wajib ke atasnya, kerana bencana dan ancaman tersebut (al-Bakri: 2011: 70).

Batasan Berkemampuan/ Istito'ah (استِطَاعَةٌ) dari Pandangan Ulama Mazhab Syafi'i

Terdapat beberapa perbezaan pendapat di kalangan ulama' mengenai bentuk dan batas kemampuan itu, diantaranya pendapat Madzhab kita iaitu pendapat ulama' Syafi'i. Bagi umat Islam yang tinggal jauhnya dari Makkah ialah 89 km ataupun lebih, maka syarat mampu mengerjakan haji atau umrah meliputi kemampuan fizikal, Keupayaan dari segi harta, kemudahan kenderaan, kemudahan air atau makanan, keselamatan dan ada teman bagi bakal jemaah haji dan umrah wanita.

Bagi maksud kemampuan keselamatan, ia membawa maksud keselamatan nyawa, harta orang yang mengerjakan haji dan umrah itu sepanjang jalan yang akan dilalui dan tempat yang sepatutnya diziarahi, walaupun hanya secara berat sangka (zanni). Maksudnya ialah keselamatan pada keseluruhannya. Jika seseorang itu rasa tidak selamat atau bimbang terhadap keselamatan nyawanya, isterinya atau hartanya kerana ada binatang buas, seteru, perompak atau penyamun (yang menunggu mereka) dan jalan-jalan lain yang selamat tidak ada, maka pada ketika itu haji dan umrah tidak wajib ke atasnya, kerana bencana dan ancaman tersebut. Jika kebiasaannya, keselamatan boleh terjamin dengan adanya pengawal, maka wajiblah digunakan pengawal. Itu pun sekiranya dia mampu membayar upah mereka dengan kadar sepatutnya, mengikut pendapat yang asah (Al-Zuhaili: 1999: 30).

Gugur Kewajipan Menunaikan Ibadat Haji Di Era Pandemik Covid 19

Gugur Kewajipan menunaikan ibadat haji dan umrah bermula tatkala dunia diserang dan dilanda Pandemik wabak penyakit Corona Virus atau Covid 19 pada musim haji 2020 dan 2021, manakala ibadat umrah pula mula diserang wabak covid 19 pada akhir bulan Februari 2020. Data Pertubuhan Kesihatan Dunia (WHO) menunjukkan berjuta-juta penduduk dunia telah meninggal dunia akibat daripada serangan Corona Virus dan wabak penyakit Covid 19 ini.

Keadaan Masyaqah atau berbahaya ini telah menyebabkan Kerajaan Arab Saudi menutup semua pintu sempada masuk negaranya bagi mengekang penularan jangkitan Penyakit Covid 19 ini, disamping untuk menjaga kemaslahatan dan nyawa rakyat Arab Saudi dan penduduk dunia amnya berdasarkan Maqasid Syariah dan kaedah Usul Fiqh, *Saddu Zara'i* disamping tidak memenuhi syarat wajib haji dan umrah iaitu *istito'ah* seperti yang dijelaskan diatas kerana masalah keselamatan nyawa, kesihatan dan tidak aman perjalanan. (Zaidan: 1993:244)

Walaupun ramai bakal-bakal jemaah Haji dan Umrah dunia yang bersedih, namun para jemaah dunia termasuk dari Malaysia tetap akur dengan apa yang berlaku, disamping berharap dan berdoa semoga suatu hari nanti pandemik covid 19 ini akan berakhir, dan para jemaah dapat kembali menunaikan ibadat haji dan umrah di Tanah Suci Mekah disamping menziarahi junjungan besar Nabi Muhammad SAW di Madinatul Munawwarah.

Di dalam syarat wajib haji dan umrah di era musim pandemik covid 19 ini, para bakal-bakal jemaah haji dan umrah tidak mencukupi syarat Istito'ah. Oleh kerana itu, para bakal-bakal jemaah tidak wajib melaksanakan ibadat haji dan umrah di Tanah Suci Mekah pada tahun 2020

dan 2021, walaupun duit simpanan telah mencukupi dan giliran dari Lembaga Tabung Haji Malaysia telah diperolehi kerana syarat wajib haji dan umrah itu adalah berdasarkan lima (5) perkara iaitu Islam, Baliqh, Berakal, Merdeka dan Istito'ah. Oleh kerana salah satu syarat tidak dipenuhi iaitu Istito'ah atau kemampuan seperti yang telah dijelaskan diatas iaitu salah satu dari maksud Istito'ah adalah keselamatan nyawa dan terhindar dari bahaya seperti wabak penyakit covid 19, maka kerana itu tidak wajib hukumnya menunaikan ibadat haji dan umrah pada tahun 2020 dan 2021 ini.

Justifikasi Undang-Undang Kerajaan Arab Saudi

Berdasarkan portal rasmi laporan COVID-19 bagi Kementerian Kesihatan Arab Saudi, sehingga 24 Jun 2020, sejumlah 164,144 kes positif COVID-19 telah dicatatkan di seluruh Arab Saudi dengan jumlah kematian seramai 1346 orang. Kes positif COVID-19 di Makkah sahaja berjumlah 51,750, mereka yang pulih adalah seramai 39,099, manakala mangsa yang meninggal dunia adalah seramai 859 orang¹. Berdasarkan perangkaan daripada Kementerian Kesihatan Arab Saudi, kes positif COVID-19 masih menunjukkan peningkatan dari sehari ke sehari. Pada 26 Mei 2020, Kerajaan Arab Saudi mengumumkan beberapa kelonggaran perintah berkurung kecuali di Makkah di samping mengekalkan larangan untuk mengerjakan umrah. Walau bagaimanapun, dalam perkembangan terkini, Kerajaan Arab Saudi memutuskan untuk menguatkuasakan kembali perintah berkurung di Jeddah untuk tempoh 15 hari, bermula 6 Jun 2020 hingga 20 Jun 2020.

Fakta di atas menunjukkan situasi penularan COVID-19 di Arab Saudi masih berada pada paras yang agak membimbangkan. Dengan kedudukan semasa ini, ia mendorong beberapa negara serantau seperti Malaysia, Indonesia, Brunei, Singapura, Kemboja dan Thailand untuk mengumumkan penangguhan penghantaran jemaah haji bagi tahun ini. Ia mungkin dilakukan setelah mempertimbangkan segala sudut terutamanya dari sudut kesihatan jemaah haji negara masing-masing.

Dalam situasi ini, sebagai umat Islam amat penting untuk kita bersikap *tabayyun* iaitu mendapatkan penjelasan dan bersangka baik terhadap segala tindakan yang diambil oleh pihak pemerintah. Kedudukan ibadah haji sebagai rukun Islam yang kelima tidak akan mudah ditangguhkan begitu sahaja melainkan sudah tentu didatangkan dengan alasan dan justifikasi yang benar-benar kukuh.

Dalam menetapkan sesuatu keputusan, pemerintah sentiasa akan mengambil kira kemaslahatan umum rakyatnya.

Kaedah menyebut:

تَصَرُّفُ الْإِمَامِ عَلَى الرَّعِيَّةِ مَنْوُطٌ بِالْمَصْلَحَةِ

Maksudnya: “Polisi pemerintah terhadap rakyatnya hendaklah berasaskan kepada maslahat.”

المصلحة العامة تُقدَّم على المصلحة الخاصة

Maksudnya: “Maslahat umum hendaklah didahulukan daripada maslahat khas.”

Para ulama' menetapkan bahawa segala tindakan yang ditetapkan oleh pihak pemerintah wajib didasari dengan maslahat dan kebaikan terhadap masyarakat umum seluruhnya; iaitu rakyat yang berada di bawah tadbir urusnya. Sekiranya tindakan tersebut bertentangan dengan tujuan dan objektif yang asal, maka tindakan tersebut dianggap tidak sah dan tidak terpakai dari sudut syarak. (Mausu'ah al-Qawa'id al-Fiqhiyyah, 2/308)

Melihat kepada kaedah yang kritikal ini, tindakan drastik yang diambil pihak kerajaan Arab Saudi bagi menyekat sebahagian perkara adalah bersandarkan kepada maslahat dan kepentingan umum agar dapat mengurangkan risiko penyebaran wabak daripada bertambah lebih teruk.

Gugur Kewajipan Pelaksanaan Ibadat Haji Dari Perspektif Fiqh

Menurut Ashab al-Syafi'e, syarat wajib mengerjakan haji itu adalah selamat dalam perjalanan daripada tiga aspek iaitu nyawa, harta dan *badh'* (yang berkaitan haji wanita dan *khuntha*). Imam al-Haramain³ mengatakan, aman yang dimaksudkan bukan semestinya ke tahap aman yang bersifat yakin atau aman seperti mana dalam keadaan tidak bermusafir. Akan tetapi aman atau selamat pada setiap tempat itu mengikut yang selayaknya atau sesuai dengannya. (*al-Majmu' Syarh al-Muhazzab*, 7/80-81)

Menurut pendapat kedua dalam mazhab, haji tidak diwajibkan jika bimbang keselamatan diri dalam perjalanan (*khawf al-tariq*). Ini kerana, jika seseorang memerlukan pengawal keselamatan untuk melindungi diri dan hartanya daripada perompak jalanan, maka haji tidak wajib dikerjakan tanpa khilaf. (*al-Majmu' Syarh al-Muhazzab*, 7/82)

Ini bermakna, jika keselamatan daripada bahaya berbentuk fizikal seperti perompak, musuh dan haiwan buas yang boleh menggugat nyawa dan harta benda boleh menjadi sebab haji tidak diwajibkan, apatah lagi bahaya bersifat penyakit yang menjadi pandemik seperti covid-19. Bahaya tersebut bukan sahaja berkemungkinan wujud ketika dalam perjalanan pergi dan balik, bahkan ia secara pasti sedang menular di tempat yang ingin dituju iaitu Makkah al-Mukarramah.

Menurut pandangan muktamad dalam Mazhab Syafi'e, ibadah haji termasuk dalam kategori *wajib muwassa'* iaitu kewajipan yang mempunyai keluasan waktu untuk mengerjakannya. Dengan maksud, seseorang yang telah memenuhi syarat wajib untuk menunaikan haji, masih lagi tidak diwajibkan secara serta merta untuk menunaikan haji. Imam al-Nawawi menyatakan seperti berikut. Walau bagaimanapun, dari segi keutamaan, bagi sesiapa yang telah sampai kepada tahun berkemampuan untuk menunaikan haji, disunatkan untuk dia tidak melewatkan atau menanggukannya. Ini bagi memastikan dirinya terlepas daripada bebanan tanggungjawab mengerjakan fardhu haji, keluar daripada khilaf ulama yang mewajibkan secara serta merta dan bersegera dalam mengerjakan ketaatan. Namun jika dia melewatkannya dari

tahun berkemampuan, tetapi sempat mengerjakannya sebelum meninggal dunia, maka dia tidak berdosa. Ini berdasarkan keadaan Rasulullah SAW sendiri yang menanggukkan haji ke tahun 10 Hijrah tanpa sebarang halangan. Akan tetapi, penanggukan tersebut mestilah disertai dengan keazaman yang kuat untuk melaksanakannya pada tahun-tahun akan datang. (*al-Hajjwa al-'Umrah, Ahkam Fiqhiyyah Sadirah 'an al-Mazhab al-Syafi'iy wa Baqiyyah al-Mazahib al-Arba'ah*, 10-11)

Ini menunjukkan seseorang yang menanggukkan pemergian hajinya ke tahun yang lain tanpa sebarang halangan, tidak sesekali berdosa jika dia berazam untuk pergi pada tahun-tahun lainnya. Apatah lagi jika dia menanggukkan pemergian hajinya ke tahun lain disebabkan keuzuran yang tidak dapat dielakkan seperti wabak penyakit yang melanda seluruh dunia.

Perspektif Qawaid al-Fiqhiah dan Maqasid Syariah

Dalam isu penanggukan haji disebabkan oleh penularan COVID-19, jika pihak yang berkepakaran iaitu Kementerian Kesihatan Malaysia (KKM) telah memberikan pandangan akan realiti dan risiko yang bakal dihadapi sekiranya jemaah haji Malaysia tetap menunaikan haji, maka ia boleh menjadi penilaian kukuh dalam menentukan ukuran darurat yang sebenar. Terdapat beberapa kaedah yang disebutkan oleh fuqaha' dalam berinteraksi dengan situasi darurat atau perkara yang boleh membawa kepada kemudharatan. Antaranya seperti berikut:

Pertama: Antara hadith yang menjadi kaedah feqah masyhur ialah:

لا ضرر ولا ضرار

Maksudnya: “Janganlah memudaratkan diri sendiri dan memberi kemudharatan kepada orang lain.”

Riwayat Ibn Majah (2341) dan al-Daraqutni (4/228)

Kedua: Apabila berlaku kemudharatan, maka wajib dihilangkan kemudharatan tersebut. Ini berdasarkan kaedah:

الضرر يزال

Maksudnya: “Kemudharatan hendaklah dihilangkan.” (*al-Wajiz fi Idhah Qawaid al-Fiqh al-Kulliyyah*, 258)

Ketiga: Kemudharatan dihindari daripada berlaku dengan semampu mungkin. Ini berdasarkan kaedah fiqh:

الضرر يدفع بقدر الإمكان

Maksudnya: “Kemudaratan itu hendaklah dihindari semampu mungkin.” (*al-Wajiz fi Idhah Qawa'id al-Fiqh al-Kulliyah*, 258)

Syeikh al-Zarqa berkata: Mudarat hendaklah ditolak dengan semampu yang boleh. Jika boleh ditolak keseluruhannya, maka lakukanlah. Sebaliknya, jika tidak mungkin, maka hendaklah mengikut kadar kemampuan. (*Syarh al-Qawa'id al-Fiqhiyyah*, hlm. 207)

Dalam menangani wabak COVID-19, penangguhan haji adalah bertepatan dengan kaedah-kaedah di atas bagi membendung wabak tersebut daripada semakin tersebar sama ada dalam kalangan jemaah haji tempatan mahupun negara lain. Kaedah tersebut sebagaimana kaedah yang dinyatakan dalam hadith Rasulullah SAW yang masyhur:

إذا سمعتم بالطاعون بأرض فلا تدخلوها، وإذا وقع بأرض وأنتم بها فلا تخرجوا منها

Maksudnya: “Jika kamu mendengar penyakit taun melanda di suatu kawasan, janganlah kamu masuk ke kawasan tersebut. Dan jika kamu berada di kawasan tersebut, maka janganlah kamu keluar dari situ.”

Riwayat al-Bukhari (5728), Muslim (2218) dan Ahmad (21860)

Hadith ini menunjukkan pemerintah boleh mengambil tindakan kuarantin atau sebarang sekatan agar penyakit atau wabak tidak tersebar. ‘Abd al-Rahman bin ‘Auf R.A pernah menyebutkan hadith ini kepada Khalifah ‘Umar bin al-Khattab ketika beliau bercadang pergi ke Syam semasa wabak taun sedang merebak di sana. Mendengar hadith ini, Amirul Mukminin ‘Umar al-Khattab membatalkan hasratnya. (*al-Bidayah wa al-Nihayah*, 3/5)

Keempat: Kaedah *fiqh al-Aulawiyat*:

درء مفسد مقدم على جلب المصالح

Maksudnya: “Menolak kemudaratan itu hendaklah didahulukan daripada mendapatkan maslahat.” (*Al-Asybah wa al-Nazair*, 87)

Apabila berlaku pertembungan antara memperoleh kebaikan dan menolak kemudaratan, maka perlu diutamakan menolak kemudaratan. Dalam isu penularan wabak COVID-19 pada musim haji tahun ini, maka perlu didahulukan menolak kemudaratan iaitu dengan menanggukkan pemergian haji. Hal ini disebabkan kemudaratan yang ada bersifat pasti atau sangkaan kuat iaitu boleh menggugat nyawa. Sedangkan kebaikan yang ingin diperoleh iaitu menunaikan haji masih boleh dikompromi kerana ia merupakan wajib *muwassa'* yang harus ditanggukkan lebih-lebih lagi dalam keadaan darurat.

Kelima: Memelihara *Maqasid Syariah* menjaga nyawa. (الضرورات الخمسة)

Al-Daruriyyat al-Khamsah dalam Maqasid Syariah iaitu keperluan yang manusia bergantung kepadanya sama ada dari sudut kehidupan beragama atau keduniaan. Jika ia tidak ada, maka akan berlaku kekurangan dan ketidaksempurnaan hidup manusia di dunia dan azab seksa di akhirat. Al-Daruriyyat yang asasi ini merangkumi lima perkara iaitu agama, nyawa, akal, keturunan dan harta benda. Ia melibatkan kelangsungan hidup manusia. Menjaga nyawa merupakan prinsip yang kedua terpenting mengikut urutan keutamaan untuk dijaga selepas memelihara agama. (*al-Mustasfa Min 'Ilm al-Usul*, 217)

Dalam isu penangguhan mengerjakan ibadat haji, ia dilakukan bagi menyelamatkan rakyat daripada risiko terkena penyakit COVID-19 yang boleh menyebabkan kematian. Ia sesekali tidak membelakangkan prinsip pertama iaitu memelihara agama. Ini kerana, pelaksanaan ibadah haji hanya diwajibkan dalam keadaan memiliki *istitha'ah* atau kemampuan. Dalam keadaan seseorang tidak mampu melindungi keselamatan dirinya daripada penyakit tersebut, maka ia tidak lagi termasuk dalam kategori golongan yang berkemampuan. Apatah lagi apabila ia telah diperakui oleh pihak berautoriti seperti kerajaan.

Kesimpulan

Justeru, Mesyuarat Jawatankuasa Muzakarah Khas MKI Kali Ke-6 yang bersidang pada 9 Jun 2020 melalui Sidang Video di Kompleks Islam Putrajaya, telah mengambil ketetapan bahawa pelaksanaan ibadah haji pada tahun 1441 Hijrah/ 2020 Masihi ditangguhkan berikutan penularan wabak COVID-19. Muzakarah berpandangan penangguhan ibadah tersebut berdasarkan *Istitho'ah* (الإستطاعة) (melibatkan kemampuan menunaikan ibadah haji daripada beberapa aspek iaitu kesihatan, kewangan, keselamatan bakal haji dan keizinan melakukan perjalanan ke Arab Saudi. Tanpa persediaan yang cukup untuk memenuhi kemampuan-kemampuan tersebut, syarat *istitho'ah* tidak dapat dicapai bagi menyempurnakan ibadah haji. Kefardhuan ibadah haji dikategorikan sebagai kewajipan yang luas waktu pelaksanaannya (الواجب الموسع). Ia harus ditangguhkan apabila syarat wajib tidak sempurna pada tahun tersebut.

Dalam Muzakarah Haji Kebangsaan 2022 juga menyatakan, Dalam menjaga Adab Mahmudah, maka Jemaah Haji dinasihatkan tidak melakukan Tawaf Wada' dan ibadat sunat yang lain di Dataran Kaabah bagi mentaati keputusan Kerajaan Arab Saudi disamping mengelakkan Masyaqqah di Dataran Kaabah serta mengekang wabak penyakit Covid-19 dari kembali menular.

Akhir kalam, hukum menunaikan ibadat Haji bagi Jemaah Haji dunia pada musim Haji tahun 2020 dan 2021 adalah tidak wajib dan tidak berdosa meninggalkannya serta gugur kewajipannya secara automatik kerana tidak menepati Al-Quran, Hadis Rasulullah saw, Fiqh, Qawaid Fiqhiah dan Maqasid Syariah serta syarat wajib Haji yang kelima iaitu *Istitho'ah*. Manakala justifikasi yang diputuskan oleh Undang-undang kerajaan Arab Saudi adalah tepat dan selari dengan Al-Quran dan As-Sunah, Fiqh, Qawaid Fiqhiah dan Maqasid Syariah serta

mempunyai hikmahnya yang tersendiri. Diharapkan, hasil penulisan ini akan menjadi panduan dan rujukan kepada bakal-bakal jemaah Haji agar dapat menerima ketentuan Allah SWT dan menyakini hikmahnya yang mana pelaksanaannya pada masa akan datang adalah masa yang lebih sesuai tanpa ada bahaya dan kebimbangan penyebaran wabak penyakit dalam melaksanakan ibadat Haji seterusnya lebih tenang dalam mengejar haji yang mabrur.

Bibiliography

Al-Quran Al-Karim

- Al-Bakri, Zulkifli. 2011. *Kitab Taudih Syarah al-Idoh Manasik al-Hajj wal-Umrah*. Cetakan 2. Bangi. Darul Syakir.
- Al-Bukhari, Muhammad Ismail Abu abdullah. 1987. *Sahih Al-Bukhari*. Cetakan.2. Bierut. Dar Ibnu Kathir.
- al-Burnu, Muhammad Sidki Ahmad. 1997. *Mausu'ah al-Qawa'id al-Fiqhiyyah*. Riyadh. Maktabah at-Taubah.
- al-Burnu, Muhammad Sidki Ahmad. 1996. *al- Wajiz fi Idhah Qawaid al-Fiqh al-Kulliyyah*. Beirut. Muassasatu ar-Risalah.
- Al-Fatani. Abdul Faqir al-Fatani Muhammad Bin Ismail Daud Fatani. *Matla Al-Badrain*
- Al-Khin. Mustafa, al-Bugha, Mustafa, al-Syarbaji, Ali. 2004. *Fiqh Al-Manhaji Ala Mazhab Imam As-Syafi'i*. Cetakan 1. Jabatan Mufti Kerajaan Negeri. Negeri Sembilan.
- Al-Makki, Abdul Fatah Hussain. 1995. *Kitab I'doh Fi Manasik Al-Hajj Wal-Umrah*. Cetakan 3. Makkah. Maktabah Al-Imdadiah.
- Al-Munziri, Abdul Azim. *Al-Tarhib Wa At-Tarhib*. 1968. Cetakan 3. Egypt. Dar Ihya al-Turath Al-Arabi
- Al-Nadwi, Ali Ahmad. 2000. *Al-Qawaid Al-Fiqhiah*. Cetakan 5. Damsyik. Dar Qalam.
- Al-Nawawi, Muhyi al-Din Yahya bin Sharaf. *al-Majmu' Syarh al-Muhazzab*, Beirut. Lubnan. Dar Kutub al-Ilmiah.
- Assubki, Imam Tajuddin Taqiyuddin. 1411-1441 μ . *Al-Asyhbah wa al-Nazair*. Beirut. Lubnan. Dar Kutub al-Ilmiah.
- Al-Qusyairi. Muslim Al-Hujjaj Abu Hussain. *Sahih Al-Muslim*. Bierut. Dar Ihya AlTuras.
- Al-Zuhaili, Wahbah. *Fiqh dan Perundangan Islam*. 1999. Dewan Bahasa Dan Pustaka. J.3. C.3.
- Lembaga Tabung Haji Malaysia. *Ibadat Haji, Umrah Dan Ziarah*. 2008. Cetakan 2. Percetakan Warni Sdn. Bhd.

-Zaidan, Abdul Karim.1993. *Al-Wajiz Fi-Usul Al-Fiqh*. Cetekan 1. Kaherah. Dar Tauzik Wa Nashru Al-Islamiah.

Zarqa, Ahmad. 1983. *Syarh al-Qawa'id al-Fiqhiyyah*. Beirut. Dar Gharb al-Islami.